

## Mumentu

E' sira tardu. Li carusi dormunu.  
Na la tirrazza nsemula assittati,  
ni gudemu lu friscu di la notti  
di Zafarana, tutta profumata  
di gersumini. A leggiu tu mi cunti  
chiddu c'ha' fattu, appressu a li to' figghi,  
duranti la jornata. Iú t'ascutu  
tinènnuti li manu ntra li mei  
e vardànnuti l'occhi ca stralùciunu.  
A 'n-certu puntu, mentri ca parràmu,  
li casi, lu paisi, la campagna,  
lu munnu stissu e lu stiddu celu  
ci scumpàrunu attornu e non ristàmu  
ca tu e iú, spirduti, ppi 'n-mumentu,  
nta 'n-universu fora di lu tempu,  
ca ni tinemu stritti e ni scanciamu  
tutta l'ardenza di li nostri cori.  
E mentri ca ti strinciu a lu me pettu,  
'n-menzu a li to' capiddi s'impurùgghianu  
li stiddi di la notti e spicchiulianu  
comu tanti cucciddi d'acquazzina.